

Na osnovu člana 56. Zakona o organizaciji organa uprave u Federaciji Bosne i Hercegovine („Službene novine Federacije BiH”, broj: 35/05), u skladu s Odlukom o usvajanju Programa utroška sredstava s kriterijima raspodjele sredstava tekućih transfera utvrđenih Budžetom Federacije Bosne i Hercegovine za 2025. godinu Federalnom ministarstvu kulture i sporta - Federalnom ministarstvu kulture i športa („Službene novine Federacije BiH”, broj: 40/25), federalna ministrica kulture i sporta objavljuje

**JAVNI POZIV
za odabir projekata koji će se sufinansirati iz Budžeta Federacije Bosne i
Hercegovine u 2025. godini**

Sredstva za sufinansiranje projekata dodjeljivat će se u skladu s Odlukom o usvajanju Programa utroška sredstava s kriterijima raspodjele sredstava tekućeg transfera utvrđenog Budžetom Federacije Bosne i Hercegovine za 2025. godinu Federalnom ministarstvu kulture i sporta - Federalnom ministarstvu kulture i športa.

TRANSFER ZA INSTITUCIJE ZNANOSTI I KULTURE OD ZNAČAJA BIH

I. Odabir programa i projekata vršit će se za sljedeće namjene

PROGRAM: Projekti i programi institucija nauke i kulture od značaja za Bosnu i Hercegovinu

Ukupan iznos raspoloživih sredstava: 1.000.000,00 KM

Sredstva će se dodjeljivati u rasponu od 10.000,00 do 80.000,00KM

II. Cilj Javnog poziva

Cilj Javnog poziva je podrška projektima/programima koje realizuju institucije i ustanove nauke i kulture od značaja za Bosnu i Hercegovinu, a koji:

- doprinose razvoju, očuvanju i promociji nauke i kulture u Bosni i Hercegovini,
- jačaju institucionalni kapacitet,
- doprinose ostvarivanju strateških ciljeva u oblasti kulture i nauke.

III. Pravo podnošenja zahtjeva

Pravo podnošenja zahtjeva na ovaj Javni poziv imaju institucije i ustanove nauke i kulture registrovane u Federaciji Bosne i Hercegovine koje imaju iskustvo u provođenju kulturnih ili naučnih programa/projekata a koje su po svojoj važnosti od značaja za cijelu državu. Finansirat će se **isključivo projekti koji započinju i završavaju u 2025. godini.**

Na ovaj Javni poziv nemaju pravo aplicirati korisnici sredstava Federalnog ministarstva kulture i sporta, koji nisu u cjelosti ili djelimično namjenski utrošili i opravdali dobivena sredstva u skladu s rokom naznačenim u Ugovoru.

IV. Opšti i posebni kriteriji za raspodjelu sredstava programa – Projekti i programi institucija nauke i kulture od značaja za Bosnu i Hercegovinu

Opći kriteriji:

1. Relevantnost projekta,
2. Kvalitet projektne ideje i pristupa,
3. Kapacitet institucije i tima,
4. Održivost i utjecaj projekta,
5. Troškovnik i troškovna efikasnost,
6. Regionalna i međunarodna dimenzija projekta,
7. Inkluzivnost i doprinos društvenoj koheziji

Posebni kriteriji:

1. Povezanost projekta sa strateškim ciljevima kulture/nauke BiH,
2. Jasno definisani ciljevi, aktivnosti i očekivani rezultati projekta,
3. Iskustvo nositelja projekta u realizovanju sličnih projekata,
4. Dugoročna vrijednost planiranih aktivnosti i nakon završetka projekta,
5. Jasno razrađeni troškovi projekta po aktivnosti i racionalni su,
6. Projekat uključuje institucije/pojedince iz drugih regija Bosne i Hercegovine,
7. Projekt aktivno uključuje ranjive/marginalizovane grupe.

V. Dokumentacija

Obavezna dokumentacija i dokumentacija za posebne kriterije od tačke 1 do tačke 13 dostavlja se numerisana istim redom kako je navedeno. Numeriše se svaki papir/stranica redom i mora biti **spiralno uvezana** u cjelinu.

Dokumentacija koja ne bude uvezana i numerisana na prethodno navedeni način **neće biti uzeta u razmatranje** i smatrat će se formalno-pravno neispravnom.

Obavezna dokumentacija

1. Prijavni obrazac, elektronski popunjen, potpisan i ovjeren pečatom pravne osobe, dostupan na web stranici Ministarstva (original);
 2. Uvjerenje o poreznoj registraciji - identifikacijski broj (original ili ovjerena kopija);
 3. Rješenje o razvrstavanju - Klasifikacija djelatnosti (kopija);
 4. Uvjerenje porezne uprave o izmirenim poreskim obavezama aplikanta ne starije od šest mjeseci do dana objave javnog poziva (original ili ovjerena kopija);
 5. Aktuelni izvod iz registra, ne stariji od šest mjeseci do dana objave javnog poziva (original ili kopija ovjerena u općini ili u notarskom uredu);
 6. Potvrda banke ne starija od tri mjeseca do dana objave javnog poziva (original ili ovjerena kopija), u kojoj je navedeno:
 - a) da račun nije blokiran;
 - b) broj transakcijskog računa
 - c) ID broj korisnika;
- Za budžetske korisnike koji koriste depozitne račune potrebno je dostaviti potvrdu od nadležnog ministarstva finansija ili pravne osobe na čije je ime otvoren depozitni račun, s brojem depozitnog računa i instrukcijom za plaćanje (original ili ovjerena kopija);
7. Bilans stanja i bilans uspjeha ili račun prihoda i rashoda za 2024. godinu, sa vidljivim pečatom Finansijsko informatičke agencije (FIA). Subjekti registrovani u 2025. godini nisu obavezni dostavljati bilans stanja i bilans uspjeha (original ili ovjerena kopija).

Dodatna dokumentacija

8. Izjava/obrazloženje nositelja projekta o usklađenosti s važećim strategijama u Federaciji BiH i BiH (npr. Strategija razvoja kulture, kulture) ovjerena i potpisana od strane nositelja projekta;
9. Dokaz o prethodnim sličnim uspješnim aktivnostima;
10. Organogram ustanove, CV ključnog osoblja, reference i stručne biografije;
11. Plan za nastavak aktivnosti nakon završetka projekta;
12. Dokazi o partnerstvima s drugim institucijama iz BiH i inostranstva (pisma namjere, memorandumi o saradnji, pozivi);
13. Dokazi o učešću ranjivih ili marginalizovanih skupina (npr. programi, izjave, partnerstva).

VI Dostavljanje dokumentacije

Svi zainteresovani aplikanti koji ispunjavaju uslove tražene ovim Javnim pozivom svoje programe/projekte zajedno sa zahtjevom, koji mogu preuzeti na zvaničnoj web stranici: www.fmks.gov.ba, trebaju dostaviti na adresu:

Federalno ministarstvo kulture i sporta –Federalno ministarstvo kulture i športa

NE OTVARATI – ZA JAVNI POZIV „Transfer za institucije nauke i kulture od značaja za Bosnu i Hercegovinu“

Na poledini kovert obavezno je navesti naziv pošiljatelja, adresu pošiljatelja, kontakt telefon i staviti pečat institucije.

Prijave se mogu predati isključivo putem pošte zaključno s **19. 6. 2025. godine.**

UPUTSTVO APLIKANTIMA

- Prijavni obrazac mora biti elektronski popunjen, potpisan i ovjeren.
- Prijave koje nisu dostavljene na propisanom obrascu, netačne i nepotpune prijave i prijave koje nisu dostavljene u navedenom roku neće biti razmatrane.
- Potrebno je da aplikant dostavi spisak dokumentacije koju je dostavio uz prijavni obrazac.
- Aplikant je odgovoran za tačnost podataka u prijavi na propisanom obrascu. Ukoliko aplikant pogrešno popuni prijavu ili ne dostavi sve tražene dokumente, smatrat će se formalno-pravno neispravnim.
- Finansijski plan, koji se nalazi unutar prijavnog obrasca, treba biti detaljno razrađen po stavkama. U suprotnom će se prijava smatrati formalno-pravno neispravnom.
- Potvrda banke koja ne sadrži identifikacijski broj aplikanta, transakcijski račun aplikanta i izjavu o aktivnosti računa aplikanta neće biti prihvaćena.
- Aplikant je odgovoran za dostavljanje tačnih podataka. Dostavljeni podaci ne mogu se mijenjati za vrijeme trajanja Javnog poziva.
- U toku realizacije projekta bilo koja promjena adrese, broja telefona, promjene kontakta, ovlaštene osobe ili broja računa kod banke, moraju biti dostavljeni u pisanoj formi ovom Ministarstvu. Federalno ministarstvo kulture i sporta neće se smatrati odgovornim u slučaju da ne uspije kontaktirati aplikanta.
- Svi dokumenti moraju biti isključivo na jednom od službenih jezika u Federaciji BiH.
- Ukoliko podnositelj prijave na zatvorenoj koverti ne upiše naziv transfera za koji aplicira, te ne navede naziv podnosioca prijave, adresu i kontakt telefon i ne stavi pečat organizacije, prijava neće biti uzeta u razmatranje.
- **Dokumente je potrebno numerisati na način da se numeriš svaka stranica/ papir redom i da se spiralno uveže kao cjelina.** Numerisanje se vrši redoslijedom kako je navedeno u traženoj dokumentaciji. Dokumentacija koja ne bude uvezana i numerisana na prethodno navedeni način neće biti uzeta u razmatranje i smatrat će se formalno-pravno neispravnom.

- Dokazi o realizovanim projektima iz prethodnog perioda koji se neće prihvaćati su: fotografije, popis linkova, CD-ovi, tekstovi objavljeni na društvenim mrežama (Facebook, Instagram, Twitter i sl.), ugovori i odluke o dodjeli sredstava, te drugi dokumenti iz kojih nije jasno vidljivo da je aplikant realizovao projekat.
- Svi dokazi za dodatnu dokumentaciju moraju imati vidljive pečate i potpise ovlaštenih osoba (sporazumi, memorandum i o saradnji, potvrde, preporuke i drugo).
- O rezultatima Javnog poziva aplikanti će biti obaviješteni putem zvanične web stranice <https://fmks.gov.ba> u roku od 30 dana od dana zatvaranja Javnog poziva.
- Svaki član Komisije bit će isključen iz postupka dodjele ukoliko se utvrdi da je u sukobu interesa u odnosu na podnosioca prijave, a podnosioci prijave imaju mogućnost prijaviti sumnju na postojanje sukoba interesa, o kojem će davatelj budžetskih sredstava odlučivati pojedinačno o svakoj prijavi.
- Podnositeljima prijava po Javnom pozivu dopušta se izjavljivanje prigovora u roku od pet (5) dana od dana objave rezultata formalno-pravne ispravnosti podnesenih prijava.
- Dopuna dokumentacije nakon isteka roka za dostavljanje prijava nije dopuštena.
- Revidirane budžete aplikanti koji zadovolje uslove za finansiranje dužni su poslati najkasnije u roku od 48 sati od datuma zaprimanja informacije o dodjeli sredstava.
- Aplikanti koji su zadovoljili uslove za potpisivanje ugovora o dodjeli sredstava dužni su cjelokupnu projektnu dokumentaciju dostaviti skeniranu na USB stiku.
- Aplikanti su prilikom pravdanja sredstava dužni uz štampani dokaz dostaviti cjelokupan finansijski izvještaj skeniran na USB stiku.